

四庫全書

史部

欽定四庫全書

史部

欽定八旗通志卷

一百九十七至
一百九十八

欽定四庫全書

欽定八旗通志卷一百九十七

人物志七十七

大臣傳六十三

漢軍正白旗二
華善 蔡毓榮

董衛國

石琳

王國安

董衛國

董衛國漢軍正白旗人初任佐領歷官

國史院學士順治十八年擢江西巡撫康熙四年加

工部尚書衛九年以病乞休

詔慰留之十三年正月改兵部尚書銜時逆藩吳三桂犯
湖南長沙失守衛國疏請發兵脩禦袁州吉安

命副都統根特巴圖魯自兗州移師赴援會逆藩耿精忠
復犯寧都廣昌南豐等處廣信副將柯昇叛應之
衛國密疏告急

命定南將軍希爾根會同衛國相機勦禦衛國復疏言袁
州逼賊氛應設總兵統兵三千鎮守並請以副將
趙應奎陞授

詔從之南瑞總兵楊富謀不軌衛國廉得實擒置之法並殲其黨

上嘉其功七月設江西總督即授衛國舊制南昌水師營兵五百以守脩領之衛國奏省衛重地應改設遊擊增兵五百又江西營制馬一步九用兵之際多一馬兵可當步兵十奏改馬二步八均如所請行十一月耿逆賊黨分犯新昌上高衛國調遊擊佟國棟叅將趙登舉守脩張射光往援大捷斬偽都

督左宗榜十四年七月與希爾根等招撫泰和龍泉永新廬陵偽官二百七十餘賊衆六萬五千有奇上高新昌金溪餘干諸寇遏廣信糧道十二月衛國奏督兵親勦值簡親王喇布駐師南昌以省城投誠人裸處堪虞督臣不宜他出奏止之十五年正月遣中軍吳友名擊賊於瑞州復上高新昌二縣二月賊圍靖安調吳友名擊之賊潰十二月遣副將許盛遊擊楊以松等先後敗賊於泰和定

南復其城十六年三月疏言賊首楊玉泰竊據宜黃樂安崇仁山谷中請統官兵掃蕩

兄之未幾招降崇仁偽總兵蔡仕伯宜黃偽總兵沈鳳祥等五月大破賊衆於大嶺陣斬偽官百餘兵五千餘復樂安玉泰窮蹙降時湖南平江及銅鼓營賊起衛國留提督趙賴守樂安調本省兵援楚會簡親王檄衛國標下兵盡赴樂安衛國以江西為楚粵控要省城駐滿兵不過二百恐守禦失利上疏

乞

賜罷斥

嚴旨責王不合並申諭嗣後調遣與衛國會商行之八月
遣兵徇建昌招撫偽總兵張發降其官一千餘衆
六萬餘九月擊走賊首朱統錫於瀘溪擒其黨金
洪尹文郁十二月遣兵徇新昌招撫偽總兵袁菊
茂等官一千三百餘衆五萬餘復銅鼓營衛國以
伏莽未靖疏請赴吉安隨簡親王協力撲勦留副

都統多諾守南昌得

旨綠營官兵聽便宜調遣十七年三月賊首韓大任赴閩
降其黨郭應輔等分據萬安泰和諸縣衛國勦其
衆四萬餘招撫偽總兵以下官三百餘衆四萬六
千餘分別安置六月吳逆犯永興薄吉安

上命衛國酌撥綠旗兵守吉安速募精銳五千脩援先是
衛國奉

旨守銅鼓營三桂既死餘黨據岳州長沙大兵圍之不下

十二月衛國奏銅鼓營寧謐無事請赴楚援勦

上嘉許並

授方畧未至岳州長沙繼定十八年正月

詔赴大將軍安親王岳洛軍協同進取於是衛國隨大軍

由衡州寶慶大敗賊於紫陽河雙井鋪復武岡城

嗣給事中李宗孔劾衛國居總督任不治事失民

心廷議革職

諭戴罪圖功十九年三月率兵破鴨婆黃茅等嶺進勦靖

州賊與都統穆占會追敗偽將軍吳應麟等復沅
州十月至鎮遠奪石巷口抵大巖門偽將軍張足
法悉衆拒衛國親奮擊大破之足法夜遁追至油
閘關而還復鎮遠城大兵既定貴州大將軍貝子
彰泰進征雲南留衛國守貴陽二十年雲南平回
任二十一年調湖廣總督二十二年廷議前綏遠
將軍湖廣總督蔡毓榮劾衛國不聽調度貽誤軍
機而衛國有平鎮遠功請免議

諭曰董衛國遵朕指授勦定賊寇恢復鎮遠實為可嘉蔡毓榮勞績遠出其下且二人敵體大臣無聽調度例以妬功故陷人重罰著將蔡毓榮降五級調用先是御史蔣伊劾衛國縱兵俘掠至是江西總督于成龍疏辯十一月衛國入

覲瀕行

諭曰爾在外二十餘年地方事宜知之已悉前此用兵之際未免騷擾閭閻今天下承平當思休養民力至於興

革利弊尤在嚴飭所屬實力奉行爾前有勞績朕罔不知毋畏人言勉圖後效十二月衛國遘疾卒於任

賜祭葬如例

石琳

兄子文晟

石琳漢軍正白旗人都統石廷柱第四子順治十四年由佐領兼禮部郎中康熙元年授山東按察使二年正月丁母憂十一月起補江南按察使三年六月以前在山東承追入官房地變價遲延降

一級調用六年十二月授浙江鹽運使十二年五月遷湖廣下荆南道十三年襄陽總兵楊來嘉副將洪福叛應逆藩吳三桂踞房縣保康竹山煽誘醜徒嘯聚南漳縣之天門蘭山雞公等寨時出剽掠石琳同總兵劉成龍搜勦斬獲甚衆撫定各寨洞總督蔡毓榮疏報捷功得

旨嘉獎十五年九月遷江南按察使二十年五月遷浙江布政使二十三年九月擢湖廣巡撫二十四年工

部以建造

太和殿檄催各省採運楠木杉木琳以楠木產自萬山之中挽運維艱疏請輟限部議不准

上曰各省所運楠木杉木山路崎嶇挽運艱難若限期太迫恐致擾民其令從容運送勿累民力二十五年十一月調雲南巡撫二十六年十二月疏言省城外松華壩并金汁等六河壩開上引松華諸山之水源下以資昆明諸縣之灌溉額設歲修銀八百兩貯

庫以待不時之需自康熙二十二年修築後迄今
四載屢被山水衝決致田禾淹沒今急需修築勘
估銀三千一百六十兩請動支貯庫歲修銀俟工
竣報銷事下部議行二十八年五月疏言臣奉

旨詳察賦役全書應行更改增刪者謹採訪輿情臚列八
條一滇省自明初置鎮設衛以田養軍名曰屯田
又有給指揮等官為俸聽其招佃者名曰官田其
每畝租入較民賦十數倍猶之佃民納租於田主

我

朝開滇之始吳三桂留鎮就昔日之租數充正供之糧額相沿至今積逋逾多官民交困當改照民賦上則例起科者也一滇省鹽井有九竈戶從井汲滷用柴薪煎煮工費甚繁以各井行鹽之多寡為每歲徵課之重輕阿陋等六井井小課少辦納猶易若瑯井每觔征課六釐白井每觔征課八釐至黑井每觔征課一分六釐此明末亂時額外橫加

較明初原額每觔二釐有奇不啻數倍今即難議
盡減如原額當減黑白二井照琅井每觔六釐者
也一開化府自康熙四年吳三桂勦平土酋後勘
丈額田七百五十九頃有奇每畝科米一斗六升
三合較之在昔未設府以前每畝不過二三升相
去懸殊且通省民糧最重者惟河陽縣上則田每
畝征米八升一合有奇今當酌量減半與河陽縣
一例者也一元江府由土改流吳三桂因官兵駐

防糧運不繼遂於額糧之外別立名色曰田錢地
講銀曰茶商稅銀曰普洱無耗秋米曰浪媽等六
寨地租以元江之崎嶇山谷加此數倍之糧實難
辦納所當各減其半者也一通海縣六寨地糧較
民賦重幾三倍當改照新定民賦科則磬嘉縣每
糧一石徵條編銀四兩有奇較通省亦為偏重今
既歸南安州附徵即應與州一例每糧一石徵條
編銀一兩四分者也一麗江界連土番古稱荒服

卷一百九十八
吳三桂叛後割金沙江以內喇普地與蒙番地去
而糧額猶存所當刪除者也一建水州自明時設
臨元叅將歲派村寨陋規銀三百二十六兩馬料
襍糧八十二石原由貪墨取求吳三桂搜括軍糧
遂編入正額所當裁革者也一新平縣之銀場易
門縣之銅廠開採年久礦斷山空商逃匠散各官
捐賠課稅難免派累小民所當盡與豁免者也茲
當更造全書

聖諭諄諄惟恐民情壅闕臣會同經管錢糧諸臣再四叅

酌敬陳各條伏祈

睿裁垂之永久疏下所司議俟全書刊定

頒發遵行是月擢兩廣總督三十一年三月疏言瓊州總

兵吳啟爵奏瓊州所屬黎地應設一州四縣建築

五處城垣增兵防守等事部議令臣會同確核隨

委惠潮道史起賢等渡海履勘復集省城公同商

酌建城五處工費浩繁若依鎮臣所奏土石竹木

就地取用近黎出力遠黎出米則以不滿九千丁之黎岐執數萬人之工役使農功盡棄田畝盡荒安保其甘心餓莩而不為刦掠至設立州縣所以治民令黎岐不通語言披髮裸身僅以片布遮其下體野性難馴其地半皆峻嶺高山深林密箐東西自薄沙營至寶停營只三百餘里南北自烏石營至藥安營亦不過三百五十里中間田畝皆就山溝零星耕種不足以供賦稅安用強設無益之

贅員且設官必設役每州縣歲需工食千兩水土
毒惡瘴氣彌漫外來之人不能服習易至損傷前
明海瑞俞大猷諸臣議開通十字路者蓋由其時
武備廢弛邊臣全無經緯平日虛兵冒餉有事罔
上邀功調兵十餘萬費餉數十萬動輒數年故為
此議終未舉行今鎮臣誤執前人之說與現在情
形迥不相符應毋庸議惟正北之水尾東北之太
平營正西之薄沙東南之寶停皆黎人出入要路

原撥鎮標兵三百名仍當留駐其增募之兵三百名亦作為經制責成鎮臣相險設防毋致踈虞再飭瓊州道府及近黎各州縣加意撫綏俾共沐

皇仁於久遠疏至

上曰閱瓊州輿圖周圍設州縣而黎人居中如果此處應取古人何為將周圍取之而在內彈丸之地反棄而不取乎不入版圖必有深意創立州縣建築城垣有累百姓不准良是三十九年十二月令總兵唐光堯勦撫出

犯寶停營傷害兵丁之生黎王鎮邦等旋就撫投
順因疏劾遊擊詹伯秀雷瓊道成恭慎遣人入黎
峒採取花梨沉香滋擾啓釁各款請解任勘究給
事中湯右曾據揭糾劾言黎人拒鬪事起於上年
十二月遲至一載始行題報有扶同掩飾希圖欺
隱情弊

詔石琳及巡撫蕭永藻提督殷化行回奏又

命侍郎凱音布學士邵穆布往審詹伯秀成恭慎論罪有

差石琳察奏不先應降二級調用得

昔從寬留任四十一年閏六月疏報廣東連州排猺逞兇
刦掠抗拒官軍傷害副將林芳把總陳溥及兵丁
從役十餘人

勅遣都統嵩祝侍郎傳繼祖等赴粵會勦分扼隘口令同
知劉有成守備黃起鵬等入排宣播

恩諭止擒首惡不及無辜各徭目遂率衆剃髮投誠獻出
兇首九名正法嵩祝等以設立州縣善後事宜交

琳辦理並與撫臣彭鵬提督殷化行悉心區畫琳
奏言連州所轄油嶺等三大排以及香鑪山等各
小排連山縣所轄軍寮等五大排以及雞公背等
各小排周圍約計四百餘里山嶺崎嶇道途窄狹
難以增設縣治莫若仍歸連州連山縣管轄擬於
近徭適中之三江口建立寨城移駐理徭同知一
員俾領把總一員兵百名不時入排巡察宣講

上諭使知各務本業以杜非為仍兼管連州陽山連山二

縣捕務再移駐副將一員都司一員守備二員千
總四員把總八員兵二十名分為左右二營令副
將管領仍兼管連陽營俱隸督提統轄所有同知
及副將等官就近撥移其兵糧應於將軍督撫提
鎮各標協營均勻派出依所派之數汰除老弱移
歸新協連陽村莊舊有鄉勇素識排內情形今應
就中考驗人力強壯技藝嫻熟者入伍食糧則汎
守益嚴矣事下九卿議行十月卒於官年六十有

四

賜祭葬如例琳兄綽爾們官二等侍衛綽爾們子文晟於康熙十八年授蘇州府同知卓異陞雲南開化府知府以琳任巡撫迴避改廣西梧州府又因琳總督兩廣改山西平陽府三十三年二月

諭嘉其居官有聲超擢貴州布政使九月遷雲南巡撫三十四年五月疏言滇省屯賦較民田重逾數倍久在

睿鑒中康熙二十七年以前逋欠屯賦銀七萬一千二百餘兩米麥十萬七百餘石已蒙

皇仁盡行蠲免矣自二十八年以來逋欠仍復如舊非軍戶敢於頑抗亦非各官不善催科也通省民賦最重者莫如河陽縣上則田糧每畝八升一合有奇地稅每畝五升九合有奇若屯田則每畝四斗五升至七斗二升不等屯地亦每畝一斗五升至三斗八升不等前者臣叔石琳撫滇時曾因奉

旨詳核賦役全書漚陳屯糧重困未經部覆仰懇

聖恩將此屯賦悉照河陽縣上則例起科不特現種人戶

易於輸納即荒蕪無徵者亦莫不踴躍樂墾矣得

旨雲南屯田錢糧較民田額重數倍民人苦累嗣後屯田

賦額照河陽縣民田上則徵收下所司知之三十六年

十一月八

覲會安南國王黎維正疏言臣國牛羊蝴蝶普園三處為

鄰界土司侵佔請

勅諭歸還

上詢及其事文晟奏言牛羊蝴蝶普園三處自明時內屬
我

朝開闢雲南即在蒙自縣徵糧至康熙五年改歸開
化府並非安南之地彼輕聽妄言擅行具奏而又
遣兵到邊臣同督臣王繼文仰體

皇上柔遠至意令防守者勿輕動臣思此地久入版圖且
在內境斷不宜給還

上命大學士詳議以黎維正輕聽妄言生事妄行申飭之
三十七年七月疏言北勝州逼近蒙番係金沙江
下流第一要地請改為永北府下部議從之四十
三年三月調廣東巡撫四十四年八月擢湖廣總
督四十五年四月疏劾湖北荊州府所屬之容美
土司田舜年僭造宮殿兇惡不法各款據附近土
目向久忠等紛紛具控備錄原詞恭陳

睿覽請

勅察究尋又疏言田舜年居心殘毒行事乖張若不繩之以法恐夜郎自大與各土司仇殺洩忿滋擾邊隅
況側近紅苗勦撫未久宜彰

國法以懾苗情今值田舜年來省謁見令暫留候
旨不敢姑息養癰致貽後患五月疏言臣閱邸抄奉

旨石文晟所奏并所錄各土司呈詞三摺俱抄錄發與湖
南巡撫趙申喬湖廣提督俞益謨閱看以為何如勿得
相商各出所見具奏仰見

聖明詳慎至意臣自應靜候

睿裁今復檢出田舜年從前叛從吳逆及投誠後逐年不
法原案備錄二摺附陳

御覽田舜年已發交按察司看守請

勅下兩撫臣提臣秉公究審六月疏報田舜年在省病故
時

上已遣左都御史梅鎬內閣學士二格會審遂合疏請追
革田舜年原職以其所屬戶口收入版圖

上復遣大學士席哈納侍郎張廷樞蕭永藻覆勘還奏田
舜年未曾僭造宮殿其兇惡不法等事亦無實據
業經病故其土職請以其子承襲誣控之向久忠
等應枷責移徙內地石文晟不能詳察草率具題
應降三級調用

詔從寬以所降之級留任先是文晟以疾乞解任疏
留中未發四十六年五月

諭大學士等曰石文晟人極粗鄙若為土司而罷其職似

未得體此疏既自行引疾乞罷可允其請乃

批發革任五十二年三月逢

慶典復原品五十九年八月卒年七十有八

王國安

王國安漢軍正白旗人順治十八年由刑部筆帖
式考授宏文院中書康熙六年補

國史院典籍九年改內閣典籍十二年遷刑部員外
郎十三年授內閣侍讀學士十六年奉

命頒詔朝鮮二十一年六月擢內閣學士充纂修明史總裁官七月授浙江巡撫疏言嘉湖二幫白糧每年派運費銀三萬四千餘兩康熙三年撫臣朱昌祚請以漕船帶運並暫徵運費銀一萬八千餘兩添造新船六十四自是舡足敷撥無加派運費之累十五年以後改徵折色運船年久朽爛今白糧復徵本色請照康熙三年例將免徵運費銀三萬四千餘兩暫徵一年購船入幫抽選運白可永免加

徵從之二十三年二月擢浙江總督四月調福建
總督二十五年六月條陳臺灣事宜一臺屬士子
請照內地例府學額進二十名臺灣鳳山諸羅三
縣學照中縣十二名提學道不能渡海考校交分
巡臺履道就近管理一臺灣文武官三年後例得
陞轉內地官與兵似屬一體現在兵丁到汛年月
各不同請將此內有願在臺者聽留外餘按赴汛
年月三年調歸原營仍於內地照數撥換以示軫

恤一臺灣澎湖兵除糧米於本地支領外其餉銀
取給內地往來海船每患飄溺每年祇四月風信
極順十月波濤恬靜稍可無虞請於每年四月內
即發夏秋二季餉銀十月內即發冬季並來年春
季餉銀交該管官貯給得

旨臺灣駐防兵丁於三年內陸續盡數更換永著為例餘
如所議行二十六年三月授刑部右侍郎五月轉左二
十八年

命以刑部左侍郎銜管奉天府府尹事

陞辭

諭曰奉天為根本重地今聞遊民甚多務農者少一遇旱
潦即難補救爾至任當勸民務農嚴察光棍游手之徒
奉天田土旗民疆界相錯丈量明白以旗人餘地付之
莊頭前府尹金世鑑奏請將旗人餘地俱與百姓耕種
徵收錢糧所見甚小今已另遣官前往丈量雖係彼處
戶部之事爾在地方亦須公同詳察永定則例二十九

年十月以前在福建總督任內明知巡撫張仲舉
侵蝕錢糧扶同具題部議照徇庇例降三級調用
得

旨革去侍郎仍留府尹任三十年疏言

盛京刑部理旗民交涉事件府尹向不關預似於職
掌非宜查田土房產諸事原有府尹會同

盛京戶部審理之例請凡旗民互控案件府尹亦會
同刑部審理部議從之三十二年奉天府洊饑

命發山東倉穀四萬石由海道運賑國安以運穀四萬石
不若米二萬石之易請將所指穀石與地方官酌
易再需米州縣多近海俟運至三岔口即可分發
各城應由渾河運送如水淺難行即以漁船分運
經費既省輸送倍速

諭部速行三十四年丁繼母憂三十七年補奉天府府尹
四十六年遷兵部右侍郎四十七年轉左侍郎四
十八年奉

命赴陝西祭歷代帝王陵寢六月卒於涇陽縣予以巽官

至內閣學士

華善

華善漢軍正白旗人都統石廷柱第三子豫親王
多鐸以女妻之授和碩額駙尋任內大臣康熙六
年以元宵節赴宴時譏誚莊親王博果鐸革內大
臣仍留和碩額駙十三年三月以逆藩吳三桂反

命華善為安南將軍率師防守鎮江四月杭州將軍圖喇

奏耿精忠叛

詔華善選所部漢軍二百名領以步將二員赴浙江聽調
遣五月鎮海將軍王之鼎奏耿逆結連海賊窺伺
內地應調右路官兵集天寧洲訓練

詔華善督所部兵習水戰九月

命簡親王喇布為揚威大將軍統兵駐江寧華善與王之
鼎等叅贊軍務十五年四月改授華善平寇將軍
統轄江南滿洲蒙古兵十六年九月簡親王駐江

西疏請增兵

詔華善率江寧徽州所駐滿洲蒙古漢軍赴簡親王軍前
以平寇將軍印留付江寧副都統科爾擴岱十七
年三月授定南將軍

詔率兵進湖南駐守茶陵閏三月奏茶陵兵少恐吳逆乘
間自衡州出犯安仁攸縣請增調以資防禦時簡
親王率師進湖南

詔即以簡親王統師駐茶陵六月

詔華善進守永興八月奏言永興道阻難通且兵力單弱
致行期稽滯

詔責華善調赴永興為日已久乃藉口兵單道阻逗留不
前俟事平察議

諭趣以設策勦賊并力進征尋簡親王疏報吳三桂病死
永興賊兵解去議政王等言華善不赴永興應革
職在簡親王軍前披甲効力

上曰華善自六月調赴永興迄今未至殊負厥職我國家

將士凡有調遣俱即馳赴從未有如此遲延觀望者姑免革職披甲付將軍穆占令隨營領隊効力十八年三月穆占奏副都統布舒庫前鋒營總塔勒岱等擊敗偽將軍吳國貴范齊韓於永州華善預有功二十二年二月議政王等追論不急救永興罪擬革職籍沒家產

上以華善尚未償軍寬免籍沒二十七年三月華善疏言臣高祖布哈原係蘇完人姓永爾佳明成化年間

授建州左衛都指揮僉事臣曾祖阿爾松阿嘉靖
年間襲職臣祖石翰移居遼東臨沒時囑臣伯父
石國柱石天柱臣父石廷柱曰我雖暫來漢地然
此心依戀故土爾兄弟當力成吾志務建功業以
歸

本主其後

太祖高皇帝兵臨廣寧臣伯父國柱天柱臣父廷柱相率
出迎隨獻廣寧城

太祖高皇帝見而大喜曰我國之人仍歸我國
恩遇特優自是臣父隨征無不奮勇當先

太宗文皇帝知臣父本出滿洲

命轄滿洲精兵後乃改轄漢軍伏念臣父雖統漢軍實係
滿洲近蒙

皇上察取

國初功臣家世名字臣伯父石國柱石天柱臣父石
廷柱亦預其列謹備叙臣家世系乞

恩改入滿洲旗籍事下部議以族人官職衆多應仍留漢軍旗下嗣後編審冊內改造滿洲三十四年六月卒

蔡毓榮

蔡毓榮漢軍正白旗人漕運總督蔡士英次子初任佐領兼刑部郎中尋授京畿道御史兼叅領遷秘書院學士康熙五年授刑部侍郎七年遷吏部侍郎九年授四川湖廣總督駐荊州十年疏言蜀

省民少田荒宜廣招開墾凡候選及現任人員招
民三百戶者議叙即用即陞墾熟田畝寬限五年
起科又言蜀省衝要營員請照沿邊例題補十一
年疏言移駐弁兵其子弟有讀書者應准入籍考
試十二年請裁遵義總兵官改鎮松潘事並下部
議行是年十二月逆藩吳三桂反毓榮疏言雲貴
總督甘文焜手書遺臣言吳三桂反臣隨調沅州
總兵官崔世祿疾赴貴州禦之令夔陵總兵徐治

都永州總兵李芝蘭各率兵繼進

上諭以宜令提督桑額疾馳沅州固守

敕遣王貝勒大臣領八旗兵至荊州復

命侍衛納爾泰傳

諭毓榮籌備軍需十三年二月分設四川總督改毓榮專

督湖廣以前此招民墾荒叙功加兵部尚書銜先

是賊兵陷沅州崔世祿降賊至是常德澧州長沙

岳州相繼失守部議毓榮當賊未陷常德時不即

令桑額往守調度無能應革職

命從寬留任戴罪圖功尋丁父憂

命在任守制仍率綠旗兵偕八旗兵進勦毓榮遣中軍副將胡世英分防江口值叛鎮楊來嘉等據南漳縣之天門寨馬良坪諸處出掠城邑毓榮遣襄陽總兵劉成龍率兵禦勦屢奏捷時廣西提督馬雄叛應吳三桂以逆書與兩廣總督金光祖詭言毓榮欲携綠旗兵數千赴岳州降賊光祖為毓榮嫺戚

密遣人告之毓榮疏陳狡謀狂噬請解任回旗

上命以殫心供職勿因逆書引嫌十四年九月大將軍順

承郡王勒爾錦奏增設綠旗兵援勦二營領以兩
副將

詔毓榮統轄之毓榮尋疏言吳逆久據湖南而湖南之長
沙與江西之吉安袁州接壤郴州桂陽又與吉安
之龍泉接壤若楚省大兵由荆岳諸路進而江省
大兵亦由袁州諸路會期進攻使賊三面受敵首

尾不能相顧則我兵之勢合而賊兵之勢分一舉而膚功立奏也又言前此屢奉

恩諭陷賊官民來歸悉赦已往之罪且不惜數百萬帑金用兵勦賊無非為救民水火計惟是烽燧之區或不暇辨是民是賊恐俘戮者衆乞

勅統兵王貝勒遴選滿洲賢員齎奉撫民

勅諭隨師前進每收復城邑即稽察戶口悉予安輯賊黨以外戒毋妄殺則脅從之衆無不聞風投順矣疏

並下所司議行十七年毓榮奉

詔率兵五千隨貝勒尚善勦賊岳州因同討逆將軍鄂納
等率舟師進勦柳林嘴及君山用礮擊沉賊舟殲
賊無算賊復犯我糧艘夾擊敗之斬級千餘是年
吳三桂死大兵以次恢復岳州長沙衡州等府十
八年三月毓榮疏言洞庭湖中之君山有龍神廟
久著靈顯唐封為利涉侯宋加封順濟王我

朝順治四年

王師過湖祈風有應委官葺新昨歲七月大軍攻取湘
陰風浪疊壞船艦臣同討逆將軍鄂訥登山虔禱
即風靜浪平克復岳城湖南諸郡底定固皆

皇上威福所致亦賴湖神護助請

勅賜封祀以旌神功疏下部議視嶽鎮海瀆例封為洞庭
湖之神遣禮部祭告十月毓榮疏言湖南惟辰州
一府尚為賊據而楓木嶺辰龍關兩路皆極險隘
我軍士馬疲困宜暫休息俟糧草克繼會期進勦

上命給事中摩囉郎中伊爾格圖傳

諭曰逆賊敗遁負險未可專恃馬兵宜用綠旗步兵前進
聞蔡毓榮所屬官兵甚為強壯以此兵力何難剿除將
滅之寇從古險隘地方若不攻取豈有自定之理其如
何恢復辰沅速定雲貴詳議以聞毓榮疏言辰沅水路
直達武陵賊既扼險於陸又復據泊上游若我師
由陸路進攻恐賊以輕舟順流反襲我後宜造八
槳小船二百水陸並進並請專責一人總統諸路



綠旗兵

上允其議即授毓榮為綏遠將軍

賜勅總統綠旗兵總督董衛國提督趙賴等並受節制十
九年三月分路破賊楓木嶺辰龍關並擊壞賊船
復辰州沅州及瀘溪淑浦麻陽等縣八月毓榮請
頒勅招撫吳世璠

上諭大學士等曰吳世璠為賊渠魁恃其險阻抗拒守兵
殘害生民罪惡重大蔡毓榮不圖早滅逆寇乃欲降勅

招撫率意妄奏着嚴飭之閏八月定邊大將軍貝子彰泰與毓榮由沅州進征貴州奏言綠旗兵與滿洲兵已會合一處若各自調遣恐未能并力奏功

上命毓榮一切軍機關白大將軍商酌以行十月毓榮同董衛國督兵復鎮遠府隨彰泰定貴陽二十年正月彰泰奏賊衆萬餘欲據盤江已遣兵固守鐵索橋以禦之

上諭之曰大兵秣馬貴陽已經月餘今逆賊欲據盤江祇

遣兵前往殊昧機宜彰泰蔡毓榮當即親統大兵撲滅賊衆平定滇中勿失機會三月毓榮隨彰泰抵雲南省城營於歸化寺偽將軍胡國柄等糾賊萬餘列象陣拒戰我師分隊進擊大敗賊衆陣斬國柄及賊衆無算十月逆孽吳世璠自殺其黨以城降雲南平毓榮還任湖廣總督復原職二十一年六月調雲貴總督疏言雲貴兩省俱險要邊疆又當新復之初督標兵舊設四千未足資彈壓請增兵一千

分為五營又因議裁吳逆所設十鎮請改為六鎮
在迤西者曰鶴麗曰永順曰楚姚蒙景在迤東者
曰開化曰臨元澂江曰曲尋武霑又言中甸在金
沙江外舊轄麗江土府為吳逆割畀蒙番通商互
市今互市已停而蒙番所設喇嘛營官未撤宜令
土知府木堯仍歸其地十月又奏籌滇善後事宜
分別十款一曰蠲荒賦逆賊據滇八載按畝加糧
驅之鋒鏑地廣丁稀今各府州縣衛所報無徵地

丁額賦應亟予蠲除招徠開墾二曰制土夷前此
土目世職不過宣慰吳逆濫加偽秩或至將軍總
兵投誠之時權照偽銜給劄今當悉行追繳換給
土職其應襲者年十三以上令赴儒學習禮起送承
襲族人子弟准就試州縣舊被吳逆奪職者察明
宗派予襲以示綏柔三曰靖逋逃有逆屬舊人烏
駭鼠竄者有征兵奉裁乘間免脫者有八旗僕從
不隨師凱旋潛匿滇境者宜定首報賞格重懲窩

隱所獲之人按律量從末減自必聞風投歸不致
以畏死之故竄入生苗矣四曰議理財滇省賦稅
無多兵食仰給他省惟產五金可令民自開礦硃
而官總其稅省會及祿豐蒙自大理增設爐座以
廣鼓鑄故明沐氏莊田及入官叛產均令變價以
裕錢本其田仍一例納賦又兵弁皆有餘丁宜令
酌墾各營荒地起科後編入里甲則賦有餘而饗
可節寔為邊儲至計五曰酌安插逆屬家人曾隨

賊伍者應遣發極邊若僅受偽銜並未從行助逆
宜免其遷徙以示矜全六曰收軍仗私造軍器者
應坐謀叛論罪其土司收藏刀鎗及民人以鉛硝
硫黃貿易者並當嚴禁七曰勸捐輸滇省民鮮蓋
藏偶有侵災無從告糴請暫開捐監事例以備積
貯八曰弭野盜魯魁在萬山中初為新嵒阿蒙土
人所據聚嘯為盜內通新平開化元江易門外接
車里孟艮鎮元猛緬向者吳逆養寇自重授以偽

職令雖震龍

天威受土司銜仍宜厚集土練各兵坐鎮隘口以防後患
九曰敦寔政兵燹之後宜整理撫綏其要在墾荒
蕪廣樹畜裕積貯興教化嚴保甲通商賈崇節儉
蠲雜派恤無告止濫差所在州縣即以十事考殿
最立勸懲庶邊疆日有起色十曰舉廢墜學宮之
設以育人材吳逆煽亂悉皆顛毀今武功既成宜
敦文教有倡率捐修者錄叙以勵之其逆黨所據

官僚廨宇宜仍給為公署聽其自葺至通省稅糧
既有成額宜均本色折色之數酌存留起運之經
黔滇驛站一例酌增工食則民間永無派累矣疏
入

上以所奏各款有合時務下九卿詹事科道議行尋

諭曰土司等賴刀鎗捕獵以為生計勿槩禁止先是毓榮
自貴州進征雲南時疏劾提督趙賴駐守貴州抗
留檄調進征官兵議政王大臣以趙賴已奏明防

守緊要難於遣發寢議毓榮復劾總督董衛國不
聽調度違誤軍機

上命事平時定議二十二年部議董衛國未曾違誤且有
復鎮遠功請免議

上以毓榮妬功誣奏下部議削五級二十五年閏四月改
總督倉場侍郎十月改兵部侍郎十二月領侍衛
內大臣佟國維等奏侍衛納爾泰自首前奉使雲
南回京毓榮令其子琳餽以銀九百兩又內務府

以新自雲南歸旗之革職知州文定國訐毓榮隱匿應入官婦女及徇縱逆黨狀入奏

詔法司勘鞫得寔擬斬立決籍沒

命免死與其子琳並遣發黑龍江後

赦還三十八年卒

欽定八旗通志卷一百九十七

欽定四庫全書

欽定八旗通志卷一百九十八

人物志七十八

大臣傳六十四

漢軍正白旗三
昌 費雅達

偏圖 徐治都 王國
黃國材

宜兆熊 石文焯

徐治都

徐治都漢軍正白旗人二等男徐大貴子初任佐領兼叅領康熙七年擢直隸天津總兵八年調湖

廣彞陵總兵十三年正月逆藩吳三桂陷湖南沅
州治都率兵赴援旋以四川巡撫羅森總兵譚宏
叛應吳逆治都奉

詔自常德回守彞陵三月叛鎮楊來嘉劉之復等擁衆數
萬乘舟犯彞陵治都率兵撲剿賊衆登岸誘戰驟
以飛棹薄我城治都先已布置嚴密水陸相犄角
擊却賊衆八月楊來嘉糾黨據南漳各寨分路出
犯治都同襄陽總兵劉成龍率兵征剿斬殺過半

上嘉治都久守衝要下部議叙加左都督銜初治都赴援
常德其妻許氏聞隣境兵民多從逆權以治都令
約鎮標將弁撫慰士卒曉以大義并脫簪珥服飾
以資犒勞彛陵右瀕江總兵官廨在江濱十五年
四月賊衆駕船數百來犯治都沿江堵截賊突逼
官廨鎗砲齊發許氏中砲死湖廣總督蔡毓榮提
督桑額合疏以

聞具述治都矢志忠貞奮不顧家狀十八年三月擢湖廣

提督四月偽將軍王鳳岐擁賊衆據巫山

上慮江水泛漲時賊乘虛突犯夔陵荊州

命治都嚴行堵禦七月疏言夔陵一隅為楚蜀咽喉今賊

據巫夔上游呼吸可至宜速修五板戰艦一百並

招募土著水手操練嫻熟令夔陵鎮臣胡世英統

領以備水路防勦臣同襄陽總兵劉成龍前赴歸

州興安巴東形勢之地相機進剿事下所司議行

詔治都同四川總督楊茂勲統舟師征夔州重慶十九年正

月師至巫山楊來嘉王鳳岐與偽總兵王存仁
集賊衆萬餘負險自固我師奮勇奪山隘賊衆奔
潰復以數騎突犯治都揮刀力戰敗之楊來嘉棄
馬越山而遁王鳳岐就擒陣斬三千餘級復巫山
縣城乘勝規取夔州偽將軍劉之衛偽總兵瞿洪
陞開關納款遂復夔州府城叛鎮譚宏遣子偽將
軍譚天秘率偽總兵譚地晉譚地升繳敕印詣軍
門降治都奉

詔還守夔陵荊州諸處九月譚宏譚天秘等復叛瀘州叙州
俱陷夔州震動治都同鎮安將軍噶爾漢統兵
溯江而上分軍三隊擊賊陣擒偽總兵易文奇進
抵下關城賊衆望風胆落棄關而遁斬殺甚衆餘
賊奔入雲陽二十年進征雲陽屢挫賊鋒擒偽總
兵向旭暉時譚宏死譚天秘勢窮竄遁萬縣梁山
忠州悉平叙功晉階四等二十七年湖廣督標裁
兵夏逢龍糾衆倡亂據武昌城治都赴剿至應城

縣遇賊衆擊却之隨駐軍應城賊衆環逼治都分
兵內外夾擊賊大潰奔德安逢龍聚賊衆齊赴金
口以偽總兵楊兆先潛襲我軍後路治都偵知賊
情水陸嚴戒既而蒲圻兵縛楊兆先赴軍前降餘
賊鼓噪來犯復乘北風列巨艦二十順流而下見
我水師嚴整不敢近遂泊龍州磯下登岸衝我營
壘我軍奮勇掩擊晝夜鏖戰斬殺殆盡逢龍勢窮
合賊衆駕船泊鯉魚漕欲給我軍出敵乘虛犯我

陸營治都遣叅將鄭興都司楊明錦協力防禦自
統戰艦沿江施鎗砲焚毀賊船賊旋犯我陸營復
戰却之斬七百餘級溺水死者無算偽總兵胡耀
乾率偽文武官以城降治都入武昌安撫軍民逢
龍竄黃州會振武將軍瓦岱統八旗兵至聞武昌
賊潰追至廣州偽總兵趙得等至軍前投誠黃岡
生員宜畏生擒逢龍以獻磔於市武昌黃州悉平
治軍報捷得

旨嘉獎

賜戴孔雀翎叙功予雲騎尉世職三十二年入

覲

賜御用冠服三十三年

詔嘉其勞績茂著視提督孫思克施琅之例

特授為鎮平將軍仍管提督事三十六年閏三月卒年六

十有七贈太子少保

賜祭葬如典禮謚襄毅長子永泰先於康熙十九年襲徐

大貴二等男爵次子永年襲雲騎尉職

王國昌

王國昌漢軍正白旗人康熙七年由官學生補內閣筆帖式尋改辦事中書遷侍讀厯遷刑部郎中監察御史內閣侍讀學士二十八年隨內大臣索額圖等赴尼布楚與俄羅斯議定界事竣遷擢內閣學士三十一年授兵部督捕右侍郎三十四年丁繼母憂時廷議三路征噶爾丹中路以左都御

史于成龍督運軍糧

命國昌以原銜偕大理寺卿喻成龍赴西路督運三十五年正月授

敕印二月西路大將軍費揚古裹五十日糧進剿約國昌等輓運以濟屆期未至五月大軍自昭莫多凱旋國昌等運米四千一百餘石還屯烏喇特部界請

旨

詔就近分給喀爾喀親王善巴等七旗兵十月

勅國昌同于成龍等由呼坦和朔運米至喀喇穆綽軍營
贖前遲悞罪並坐塘効力三十六年正月大軍由
寧夏肅州兩路追勦噶爾丹國昌復同于成龍等
請自備駝馬運糧

允之會噶爾丹竄斃軍還停運十一月部臣請追議國昌
前罪有

旨寬免仍着議叙加四級三十七年擢山東巡撫三十八年
上南巡國昌迎

駕

御書圭璋特達額並淵鑒齋法帖

賜之又

賜御用夏冠袍服四十年二月吏科給事中馬士芳劾國

昌於大計重典濫薦厯城令管承寵又徇庇溺職
之長清令崔錫榮不行題叅

諭令明白回奏尋

諭大學士等曰朕聽政四十餘年凡條奏之事稍有私意

斷不能欺朕馬士芳特不喜漢軍居督撫之任故將王國昌叅奏朕所知漢人數員已盡置外任果如張鵬翮李光地郭琇者能有幾人朕曾問李光地云山東巡撫王國昌雖無過人之才但心性和平地方尚受其益果在地方安靜即百姓之福矣五月國昌疏辯部議管承寵為巡撫私人並無實據應免議其溺職之崔錫榮該撫不於大計題叅應降一級准抵從之四十年六月疏陳東省便民事宜一倉穀遵例存七

糶三於青黃不接時減價平糶秋收糶穀還倉一
德州倉米支放各營兵糧向係四季徵收春夏農
忙時輸將難猝辦應動司庫價銀米支放其額徵
米石俟秋後徵一額徵班匠銀四千餘兩均入地
丁項下徵解一魯藩舊基地聽民墾種輸租即於
開墾之年陞科給印帖俾為恒業下部議行閏六
月疏報某燕新泰東平沂州蒙陰沂水六州縣被
水請開倉賑部議如所請國昌又自捐俸三千三

百兩補賑十月

上南巡回鑾

賜御書法理寬平清慎勤二額及表裏常交正動靜自弗違
聯四十二年七月疏報新泰等州縣復被水災
請將倉穀百二十餘萬石並應運漕米十餘萬石
平糶但倉穀不便久懸仰祈

聖慈暫開事例以實倉貯至動用漕米擬將康熙四十三
年以後俸工捐補部議平糶銀於次年秋收後買

穀還倉所捐俸工令地方官發買籽粒牛隻助民耕種其請開事例無庸議先是

上以巡視河工過濟南軫念東省去歲被災降

旨蠲免錢糧並

命總督桑額以漕米二萬石交總河張鵬翮選員運赴濟

寧兗州等屬平糶加賑桑額另運米二萬石於泰

安一路協濟至是國昌疏報桑額所運米遵

旨散給河臣張鵬翮亦委員運米到東隨即酌撥各屬並

動用常平倉穀二十八萬石請於俸工分年捐還奉
旨朕前諭桑額張鵬翮各將漕糧二萬運東賑糶此扈從
諸臣所共聞者今觀王國昌所奏將常平倉收貯米穀
俱行糶賣散給與朕原諭不符王國昌又稱捐康熙四
十二三年官員俸資衙門工食賠補似此何時方能完
結此項米穀應令速行賠補貯倉是月

特命遣官截留漕米五十萬石並派八旗官員各領帑銀
三千兩馳赴山東會同地方官賑養饑民以侍郎

穆和倫辛保卞永譽分三路巡察九月

上諭大學士九卿等曰朕因山左災荒勞心殫思屢行諮訪歲歉非止今歲為然地方官厯年隱匿不報今春朕閱視河工親見災黎情形始行籌畫賑濟今歲田禾尚有薄收之處巡撫布政使為伊等素有欠缺欲巧圖完補故甚其詞以奏報又夤緣科道紛紛急奏言人民相食私異或開事例或撥銀兩因于其中侵蝕託言賑濟而實欲完補虧空以施鬼蜮之謀今京師遣往三路人

員惟視巡撫等所指地方賑濟應將此事交三路大臣加意稽察時布政使劉暄內陞國昌疏留御史顧素因劾國昌匿災又同劉暄覲開事例補虧空請

賜罷斥

諭曰王國昌不過一謹愿人朕曾詢問李光地張鵬翮伊等亦言國昌在任並無劣蹟惟劉暄乃一能巧匪人將國昌任意驅使甚易事耳此事著同前諭九卿之旨一併議奏會議國昌應革職得

旨姑留任十月部臣以國昌等擅動常平倉穀請催令賠補
詔傳詢擅動之由同張鵬翮分賠尋

諭大學士等曰朕聞山東巡撫將賑濟饑民官員齎去銀
兩俱收藩庫迄今猶未散給如此則賑濟饑民之事不
致遲誤乎此銀俱自京師發往並非伊等庫內之項且
前往賑濟人員係八旗佐領公舉殷實才能之人王國
昌等僅可查其養饑民之優劣其錢糧耗費與否係賑
濟官員之事與伊等何涉而將此銀兩收貯至今仍不

散給此係何心朕所不解是又劉暄之詭計也况派去三百餘人俱留濟南必致米價騰貴人皆受困可將朕旨交該部移問王國昌等十一月國昌回奏巡察大臣辛保等先後開賑因查極次貧民分別賑養稍稽時日疏下部議以國昌於被災時不即令州縣官查明極次貧造冊迨巡察大臣到日藉此推諉應即行議罪奉

旨草任四十三年以新任布政使趙宏燮揭報劉暄虧庫

項七萬餘兩

命侍郎舒輅傳作楫往勘得實舒輅等劾國昌藉捐俸補賑為名將存貯沂州庫銀擅用一萬三千餘兩又徇隱劉暄於宏燮揭報後補叅塞責部議依律擬流併令照數賠補得

旨限兩月內賠完免其罪五十二年以

萬壽覃恩給還原職雍正六年卒

費雅達

費雅達漢軍正白旗人由鑾儀衛整儀尉累遷潼關副將康熙十四年陝西提督王輔臣叛應逆藩吳三桂附賊日衆費雅達遵

旨招撫邵陽縣神道嶺偽把總雷成金等四百餘名得

旨嘉獎時漢中尚未恢復十五年二月總督哈占提督張

勇奏設漢中鎮總兵剿賊以費雅達才能練達謀

畧邁衆請陞補暫駐秦州得

旨費雅達著陞署都督僉事充陝西漢中總兵官十月費

雅達遣官招撫偽總兵賀天祥副將黃啟遊擊李
芳春朱彪臣等兵三千九百餘收偽劄關防馬騾
器械無算十七年大兵進取漢中十八年六月賊
衆萬餘結營於彛門鎮之高山堡費雅達偕將軍
佛尼勒為頭隊督兵先登賊敗遁九月隨奮威將
軍王進寶入棧道費雅達自馬峪河進道險分兵
越左右山梁自統兵由溝底為中路更撥一軍為
後應賊伐樹塞路我兵開通直抵秦嶺攻拔北木

城賊棄南木城遁斬級四百餘生擒四十左右後
應兵皆會追至靖寇關復分三路進賊倚蜈蚣嶺
拒守我兵自下仰攻進寶遣兵山後夾攻賊驚潰
追殺五百餘墜崖澗者無算時進寶復鳳縣城合
兵至武關費雅達由左攻擊斬關入賊大敗追至
雞頭關生擒偽總兵羅朝興斬獲千餘賊首王屏
藩走廣元遂復漢中叙功加都督同知十九年六
月同提督王之鼎防守永寧八月賊來犯拒守月

餘援絕城陷死之二十年追

贈左都督太子少保

賜祭葬諡忠勇

予騎都尉世職子維翰襲雍正七年費雅達入祀昭忠祠

偏圖

偏圖漢軍正白旗人本姓李隸內務府康熙十三年八月由奉宸苑催長應

詔揀選授都司銜赴陝西剿吳三桂叛黨署督標右營遊

擊十四年二月叛賊李長腿引賊千餘犯淳化三水焚劫三原縣之杜寨偏圖與遊擊繳應善率兵六百自涇陽進剿至紅水溝擊斬李長腿等生擒四十餘人獲旂械馬羸又隨揚威將軍阿密達軍長武率綠旗前鋒兵由南路抵瓦雲驛擒偽守備二遂與副都統鄂克濟哈合兵趨涇州賊衆扼險隘迎戰數四俱擊敗之進薄城下賊出城抵拒復斬三百餘級克其城偽總兵衛民譽等逃出南門

據寨拒守偏圖率兵圍寨斬民譽降其餘衆三月
同護軍統領舒淑擊敗賊首馬瑞軒於靈臺賊退
守陶家堡攻克之斬級百餘四月同鄂克濟哈赴
慶陽進援寧州沿途招降二十餘寨入州城偽總
兵魏虎山馮嘉德等領賊兵八千倚山城出拒偏
圖率綠旗為前隊進攻自辰至未攻克山梁擒斬
甚衆賊遁蕭家山斷壕而守翼日偏圖分兵兩路
夾攻斬殪過半餘賊遠竄乃旋軍涇州六月同副

都統穆舒琿敗賊於鎮原縣八月隨貝勒洞鄂剿
王輔臣於平涼偏圖率兵二百五十同護軍統領
阿哈多等仰攻高山賊壘破之十二月實授右營
遊擊十五年二月同副都統吳國正援商州復山
陽縣旋師擊敗偽總兵李茂榮於寬平里斬級百
餘四月賊陷三原之西陽鎮偏圖馳救賊潰遁追
至鳳凰山收撫陷掠男婦百餘五月隨大將軍圖
海圍平涼偏圖駐軍虎山墩斷賊糧道輔臣降圖

海以偏圖屢著戰功題陞潼關副將得

旨偏圖曾經効力行間今正剿滅賊寇之時仍留軍前征
剿遇缺另補十六年六月授陝西督標副將十七年閏
三月進剿興安偵賊二千餘據小山嶺掘壕樹柵
偏圖由密兒溝統出嶺旁攻毀賊巢追逐至香泉
殲賊無算十八年十月攻梁河關破賊營七遂復
興安及漢陰石泉等縣偽將軍謝泗偽總兵王永
實等各率衆降十九年三月

諭獎偏圖屢著戰功令隨勇畧將軍趙良棟恢復四川進

征雲貴二十年正月

詔設雲南總兵七以偏圖與副將馬山等即補時賊黨胡國柱王緒擁衆二萬餘屯馬湖趙良棟檄偏圖堅守雅州整飭官兵相機由間道規取象嶺大渡河曬經關擒偽守備楊名聲於榮經縣斬賊一百二十餘五月隨大軍克關山關沿途屢敗賊衆陣斬及墮崖死者無算復黎州奪大渡河隘口沿河追

賊至火場壩偽總兵蔡國明戴聖恩于登明楊泗
等窮蹙乞降六月復越雋衛及建昌乘勝入雲南
八月渡金沙江駐兵石虎關十月領兵奪取玉皇
閣及土橋東寺西寺三市街進薄城下賊平二十一
年實授永順總兵叙功加左都督三十三年正月入
覲擢雲南提督四十五年復入

覲

賜孔雀翎良馬五十年內遷鑲白旗漢軍都統五十五年

九月卒年七十有七得

旨偏圖才技優長久著勞績簡任都統謹慎持身實心盡職忽聞溘逝深為軫惻下部議卹

賜祭葬如例謚襄敬又

諭部曰偏圖前在軍前立功同綠旗官員一體議叙加左都督今可照八旗例議給世職尋

允部議予騎都尉世職以其第三子李棟襲

黃國材

黃國材漢軍正白旗人祖廷柏由生員授江南靈璧縣知縣調順天大興縣遷山西汾州府知府順治六年大同總兵姜瓖叛攻汾州城陷廷柏死之贈太僕寺卿國材於康熙十八年由監生考補內閣中書二十二年遷都察院都事三十六年遷湖廣漢陽府知府四十年授廣東雷瓊道莅任三年總督郭世隆巡撫彭鵬以卓異薦格於部議

特命引

見擢廣東按察使四十八年遷廣東布政使五十六年以
粵西山多田少需米湖南而衡湘米船由永州奸
民藉禁糶阻索致商販不前米價多昂請於上官
禁止總督楊琳巡撫陳元龍疏奏准行尋擢貴州
巡撫鎮遠至常德灘河多溺患雲貴湖南三省官
修緯道國材率先捐助併捐修城垣及演武廳捐
衣四千襲給撫標兵捐穀萬石分貯安籠威寧大
定三鎮駐劄地方置旂幟弓矢服給各營五十八年

雲貴總督蔣廷錫疏叅國材有辦事才但每事任性處死苗子阿容及王阿么等十六名以龍里縣民薛有凌貴定縣民辜瑤平伐營民徐跳等親生女嫁與楚人者指為掠販處以重刑將薛氏等賞兵其進京陞見各府屬指俸工借藩庫銀二萬五千二百兩餽送國材疏入時國材在京

命九卿傳訊國材供與原叅互異九卿請

旨派員令國材赴黔面質

上遣刑部郎中齊克坦戶部主事謝檣齡往審國材實受
屬員餽送銀萬四千兩雖供充公究屬不合應降
三級調用餘案俱虛免議得

旨黃國材著解任尋奉

命解餉西寧二次六十一年十月授鴻臚寺卿督理子牙
河務逾月擢福建巡撫雍正元年四月疏稱

聖朝定例自順治八年奉有熱審減等之條遵行甚久康
熙四十三年停止熱審蓋恐罪人希冀減等挨延

時日不無黃緣賄縱之弊但近年來夏月必

特沛恩綸暫釋刑具臣見閩廣下濕監犯之苦更甚伏思
皇上慎重民命直隸讞案必

親加詳察多予矜全臣以為似宜復熱審舊例准減等如
慮延挨倖免則嚴飭各官按限完結毋任胥吏作
弊遲延庶囹圄悉蒙寬恤之仁矣

上嘉納之下部議行八月疏言章服為等威所繫況物力
艱難尤當愛惜臣歷任外吏目睹地方淳樸者頗

多殷實奢靡者必至貧寒邇年八旗風俗奢靡衣服貴賤相同請嚴禁僭越杜絕奢華白丁下賤人等止許服黑色布疋不得用綾羅錦緞及各種細毛違者重治

上曰此奏切中時病爾等姑且徐徐勸導倘仍不改革然後嚴為定制以法繩之耳九月疏言浙江雨水缺少寧波等處民食艱難臣與督臣滿保撥福建省倉米五千石臺灣府倉米五千石由海運往減價平糶

以濟民食又言浙江象山定海溫台等處缺米撥
閩省米接濟

上深嘉之十一月以年老乞休得

旨黃國材自撫閩以來操守廉潔辦事明白軍民共相愛
戴今雖年老身尚強健著照舊供職二年九月疏言福
建鄉試額中八十五名今人文日盛請照浙江湖
廣解額中九十九名

上命增四名尋以

頌賜御筆詩扇具疏謝

恩

諭曰爾之才情朕所素悉但於廉隅二字當加砥礪撫綏
以來聲名原居滿保之右近日滿保聲名頓然改觀爾
少不逮矣及其老也戒之在得宜於此語時繹之以自
警焉十二月疏報臺灣鳳山縣南路山前生番厯厯等
五社北路山後生番八里岡等六十五社諸羅縣
北路山前生番本祿等四社男婦五千七百九十九

名口歸化三年二月疏報臺灣彰化縣內山巴萊遠
麻著獅子頭等社生番男婦八百五十一名口歸化
諭曰生番野性難馴全在地方文武官弁安戢得法封疆
大吏當嚴飭屬員施恩布教令其心悅誠服永無變更
方不愧柔遠之道是時廣西巡撫李紱上墾荒六款請
將廣西積穀酌借貧民為牛種農器資得

旨李紱條陳墾荒請動支監穀為開荒之費不過為開銷
廣西昔年捐納穀石之計此項原係陳元龍王沛檀經

手其間有名無實首尾不清之處甚多可著陳元龍王沛懽前往廣西將此項徹底清楚倘有不清着李紱查明據實叅奏三月李紱奏通政使臣王沛懽到粵咨稱

康熙五十三年前任廣西巡撫今陞禮部尚書陳元龍奏明廣西捐納穀石至五十五年停止沛懽於五十七年七月到廣西布政使任距停捐將及三年其收捐穀石係陳元龍與前任布政使黃國材任內之事當日經管官係桂林知府吳元臣柳

州知府趙世勲南寧知府沈元佐梧州知府李世
孝桂林同知黃之孝通判慕國璵六人每穀一石
折收銀一兩一二錢不等解交藩司通計捐穀百
十七萬八千餘石應收銀百三十餘萬兩其發價
買穀約計銀四十餘萬國材交四府知府給屬採
買餘銀幾及百萬並無着落請將從前經手之督
撫司道等官質訊得

旨閱李紱奏疏當日收捐穀價數倍於正項著黃國材將

收捐始末情弊奏聞如敢欺隱必從重治罪國材疏稱
廣西捐納一事撫臣陳元龍與督臣趙宏燦委桂
林府知府吳元臣等在省城收捐委梧州柳州南
寧三府知府李世孝趙世勲沈元佐等在府收捐
因捐納人買穀需時議定每穀一石折銀一兩一
錢每石各府自存六錢以為買穀蓋倉等項使用
內有羨餘係管捐府廳各官分得其餘銀五錢內
部費一錢督撫及布政使各一錢按察使及本道

各四分院司衙門書辦紙筆造冊人工飯食等費
各一分至部費一錢內臣動用三分湊修桂林平
樂梧州三府灘河及緯路營房等項業經奏明其
餘七分交撫臣作部科之費通計督撫司道共得
羨餘銀四十四萬七千七百三十五兩其四府所
得羨餘臣未經手未知其詳尋國材解任抵廣西
與各員對質督撫藩司每石得銀一錢屬實國材
扣留部科費內銀兩並藩司書辦人等飯食紙筆

銀兩應令賠補共銀二十四萬九百八十兩有奇
餘人各按數追賠分限五年完納四年八月

命以巡撫職銜署正藍旗漢軍都統事十月協理兵部侍

郎未幾授正黃旗漢軍都統五年閏三月署兵部

尚書五月署刑部尚書七月授工部尚書七年四

月湖廣總督邁柱疏叅國材子湖北布政使黃焜

令家人開當舖利買房賃租國材有廣西捐納案

內應賠銀未完雍正四年又用銀六百兩買屋一

區恣行欺罔並不變產完帑得

旨令國材回奏國材疏稱臣自奉文追銀已交銀十五萬
九千兩又有商人領去紬緞皮貨變價銀三萬兩
在本年完交其餘房屋一時難售奏入以國材巧
辯欺詐革任九年十一月卒

宜兆熊

宜兆熊漢軍正白旗人曾祖永貴安徽巡撫以軍
功授三等男祖思孝副都統父廷輔襲世爵並見

永貴傳兆熊初襲三等男康熙二十五年追叙廷
輔征雲南功晉二等男仍以兆熊襲四十年補佐
領四十一年授叅領五十七年正月遷鑲白旗漢
軍副都統十月授正藍旗漢軍都統六十一年調
鑲白旗漢軍都統尋

命署福州將軍雍正元年二月實授兆熊疏言臣抵任年
餘練兵整械查駐防四旗及臣標兩營所用盤槍
皆係三段續成久必壞又子母礮祇十八位現捐

造盤槍千九百六十一桿子母礮二位以資操演
上以捐貲過多

諭曰向後四旗兩營若有應行增造軍器不必捐貲宜動
公項為之二年疏言駐防滿洲漢軍協領與在京八旗
叅領均三品俟後在京副都統缺出請將協領與
叅領一體較俸開列得

旨此奏甚為公當朕即位以來外省副都統缺出多用駐
防協領等補授內外皆朕臣工惟拔其優者用之耳尋

御書世有令德額

賜之

諭曰福州駐防兵丁風俗甚劣自爾到任後頗覺更易朕實嘉之其益加約束務令全善三年七月

命署閩浙總督四年正月疏言臺灣南北兩路番社甚多其為害於鳳山諸羅者則山猪毛等社於彰化則水沙連等社山猪毛社前獲凶犯四名稍知畏至水沙連社半載間焚殺疊見撫之不可勢不得不

示以兵威但宜以番攻番擇各社通事土官勇壯者數人為導率番社直掃巢穴而以汎兵駐山口壯聲勢疏入

報可尋因春雨漲請俟冬進勦九月授湖廣總督嗣繼任閩浙總督高其倬檄臺廈道吳昌祚協同叅將何勉等率弁兵番壯分路覈糧剿捕首惡骨宗等二十名就擒分別正法各社相繼歸誠兆熊

陸見

諭曰昨見宜兆熊精神力量甚覺勉強楚督節制兩省文武任鉅事繁統轄匪易且又一字不識但操守尚優心術亦正藹然有忠愛之誠為可取耳十二月調署直隸總督五年正月疏言直隸各營兵餉經前任臣李紱奏准將下年春季餉銀於上年冬借司庫銀先行支給俟部撥徵解到日扣還蓋恐撥銀到遲兵未免守候洵良法可行而直屬陋弊於預支春餉外復借領銀於本年夏秋冬三季分扣兵或事故

不一借後除名其銀或於新補兵坐扣或於闔營朋扣均非情理况庫帑豈可市恩私借致令虛懸請將現借出者於本年內照扣嗣後永停借給得旨此奏酌中之論如所請行閏三月擢吏部尚書仍署總

督事九月疏言磁州駐防千總一官徵兵寡請令大名協右營守備領兵百九名移駐並令右營千總領兵百二十五名駐元城縣右營把總領兵六十一名駐小灘鎮從之十月又言霸雄等二十四

州縣被水已蒙

恩散賑其地丁錢糧暫請緩徵得

旨朕念直隸濱河之地易於被水用沛特恩遣官賑恤至被水之處仍應勘明分數題請照例蠲恤不得因已遣官發帑遂不照例遵行也時大名府知府曾逢聖因虧缺庫帑被劾

上以逢聖任畿輔有年贓欸必多

命總督藩臬等轉諭所屬被屈受害者許據實控告於是

吳橋縣生員竇相可控逢聖任吳橋時貪劣各款而布政使張适袒逢聖杖斃相可與按察使魏定國詐稱監斃兆熊及協理總督劉師恕徇匿不奏上察知之

命尚書傅敏侍郎史貽直往鞠六年正月

諭大學士等曰宜兆熊乃平常無能之人因其尚忠厚謹慎蒙

聖祖仁皇帝用至福州將軍伊並未出力報効及朕即位

伊亦不過尋常供職前因直隸總督一時不得其人令
伊署理畀以畿輔節制重任教導訓誨至再至三乃伊
于此事若罔聞知負朕任用之恩甘蹈徇隱之咎尚得
謂事君以誠無欺無隱者乎二月傅敏等勘得實逢聖
擬絞監候適定國斬監候師恕降三級調用兆熊
銷加一級仍降二級調用得

旨宜兆熊着降調仍暫署直隸總督尋疏言宣化府屬之
保安延慶二州旗民雜處向無武弁防禦文職遇

調城池倉庫門禁鎖鑰之員防護應撥張家口協
標兩營把總二員移駐改歸懷來永寧兩路叅將
都司轄從之五月

諭曰人臣和衷共濟始于公事有益朕視宜兆熊與劉師
恕意見不合諸事參差若仍令同辦總督事務必致貽
誤宜兆熊原係庸碌之人朕因其操守可取故試用之
自署福建直隸兩任觀之全不曉事著回旗照部議所
降之級補用先是兆熊署直隸總督有南宮縣民杜枚

擲傷無服族祖母劉氏身死兆熊審擬以枚係
獨子請留養至是刑部議駁言枚母范氏年未
七十與例不符兆熊所擬失當

上敕部嚴加議處尋議革職九年卒子成祚降襲一等輕
車都尉卒子宗孔降襲騎都尉兼一雲騎尉卒子
榮祖襲

石文焯

石文焯漢軍正白旗人康熙三十二年由監生授

江南松江府同知三十八年遷蘇州府知府四十
三年遷甘肅洮岷道五十三年調貴州貴東道五
十五年丁母憂五十八年補江西饒九南道五十
九年擢江西按察使六十一年五月署福州將軍
六月署福建巡撫十一月授安徽布政使雍正元
年三月擢河南巡撫六月疏報沁黃並漲黃河北
岸馬營口等處隄壩多有塌陷桃園口支河三道
引溜北趨南岸蔣家寨水逼大隄工俱危險各飭

河員搶修無虞得

旨南北岸隄工捍禦有方殊屬可嘉九月疏言黃河經行豫省千餘里自滎澤以下南北隄工均應加謹防守查江南臨河州縣有同知通判專司河務河南所設同知通判管轄數縣隄工而辦料募夫皆責之州縣必得勤幹之員經理查祥符滎澤中年鄭州陳留蘭陽儀封商邱考城虞城武陟陽武原武封邱十四州縣皆有隄工請定調補之例於本省

現任官員內擇廉能調補三年內能盡心辦理工
程平穩者題陞以示鼓勵下部議行二年正月疏
言豫省各案虧空追比年久無可變賠者自今年
為始將臣衙門所有司道規禮府州縣節禮及上
下各衙門一切節壽規禮盡行革除以杜州縣
藉口之端以塞上司勒索之路遵例令各知府遴
委賢員將州縣銀櫃封驗眼同拆封將正項即行
起解使經徵官絲毫不能侵挪所有耗羨每兩約

一錢三分通計全省耗羨銀四十萬兩有奇除各
官酌量給以養廉及各項雜用公費悉於此支給
外每年約餘耗羨銀十五六萬兩解貯司庫彌補
虧空及辦公之用至各官俱有養廉足資上司不
至苛求屬吏州縣不至挪移庫項勒索之弊除而
公帑亦長無缺矣疏入

上嘉納之七月疏言開封府轄四州三十縣河南府轄一
州十三縣汝寧府轄二州十二縣地方遼濶請改

設直隸州分轄將開封府屬之西華商水項城沈
邱分隸陳州臨潁襄城郛城長葛分隸許州密縣
新鄭分隸禹州滎澤滎陽河陰汜水分隸鄭州其
原武延津均在河北原武就近歸懷慶府管轄延
津就近歸衛輝府管轄河南府屬之靈寶閿鄉分
隸陝州汝寧府屬之光山息縣固始商城分隸光
州從之是時浙江海潮泛溢仁和等十六縣田廬
被淹

命文焯署浙江巡撫撫恤災民九月疏言臣抵浙確勘災民戶口委員監賑查煮賑浮費甚多弊端不一且小民日赴廠食粥路有遠近扶老携幼更多不便臣與布政使佟吉圖細加商酌每大口日給穀四合小口二合人給三月口糧無穀之處照時價折給各委大員以次賑完其平湖奉化定海嵎縣永嘉五縣海寧二衛所雖被災分數不符蠲賑之例然水淹之苦同一情形酌給兩月口糧以廣

皇仁至衝決塘隄已飭各地方官修築以禦鹹潮所有舊築土塘應請改建石工其一切修砌善後事宜現在確查估計奉

旨此事當再三斟酌若修砌石隄一勞即可永逸則速議改建假如勢小土隄亦可堵遏勢大雖石隄亦不能抵敵何必曠日持久多為糜費也文焯又疏言臣親歷海塘查勘今年風潮原屬僅見是以塘工不能捍禦隨分委大員將應修處丈估詳議土石塘工俱仍舊

制興修至原係土塘請改石工之處海潮勢大難保無虞不敢輕議舉行

上以文焯前後奏互異毫無定見交新任巡撫法海議奏十一月調西安巡撫三年調甘肅巡撫四年二月疏言茶法原以裕課裕課必先便商臣查商人赴楚買茶之船票必開載該商等引目茶數以為沿途照驗俾無留難再查舊例每引一道運茶百觔以五十觔交官貯庫易馬五十觔給商變賣償本

外有附茶三十觔以為運費今商人運茶至潼關廳官盤驗每引祇許過茶百觔附茶不准入陝應請照會典每茶千觔准帶附茶四十觔又陝西向設洮州河州西寧等五司賣茶每年衆商闔定司分以杜避難就易之弊其地僻茶多不能盡售者請准呈改別司發賣接濟新引庶茶法得以疏通議如所請又言各省軍犯俱發河西及平慶臨鞏四府各衛充伍今各衛俱為州縣祇有赤金靖

逆大通三衛若充發太多恐致疎縱請照河東各
衛歸併各府管轄之例令該州縣專管庶無疎虞
從之尋疏請裁平涼固原慶陽臨洮河州蘭州岷
州七衛西固一所各千總歸州縣管理下所司議
行五月以不能拘留叅員噶爾圖追帑完項部議
草文焯職又追議文焯前署浙江巡撫時蠲賑平
湖五縣海寧二衛所雖經奏明未具本題報應請
草任奉

旨從寬革職留任尋因文焯子禮哈為貴州總兵勦平狝

苗有功

上推恩文焯

賜還原職五年六月以承審四川夔州府知府程如絲販

私傷人一案錯誤

命永停給俸十月疏言平涼府屬西路同知及鹽捕通判

俱駐劄寧夏從前寧夏未經改設郡縣是以掛平


涼府銜今寧夏已改衛設府其同知所管驛站錢

糧通判所掌鹽務俱由寧夏道考核應請改隸寧夏道府下以專考成從之是月以柔懦耳聾

召回京六年正月授禮部右侍郎三月調吏部左侍郎五月授兵部尚書十月調禮部尚書八年六月

諭曰石文焯原係無知庸材自內陞以來諸凡退縮毫無踴躍奮勉之心著革職以原品在八旗井田督率効力行走九年署直隸馬蘭鎮總兵十年總理

三陵事務十三年正月卒



欽定八旗通志卷一百九十八